

Den # AMBIENTE



CARNAVAL 43 SI TA UN DOLOR DI CABEZ...


**** Aaaay...aaayy...esta un dolor ta nos CARNAVAL 43 cu ta dunando nos un fuerte DOLOR DI CABEZ.** Henter e siman aki pueblo carnavalesco ta soportando un huma stinki cu cada dia ta birando mas insoportable. E polemica entre ASOMA y SAC a cende un candela feroz cu lo bay dura masha hopi mes pa page. E candela aki hasta a penetra den edificio di Gobierno y si no paga esaki na tempo, por spera cu tanto e yabi y e rey di momo lo kima prome cu su tempo!

**** Durante henter siman aki DEN AMBIENTE durante e programa di carnaval "Boedoem" na radio Galactica a purba di paga e candela, pero tur e esfuerzonan tabata envano.** For di na luna di september di aña pasa mi tabata na altura di e problema aki y tabata sinti cu esaki lo escala den uno masha peligroso cu lo bay afecta seriamente nos tradicional fiesta di carnaval. Na luna di october durante mi programa di farandula di tur diasabra na radio Galactica, Milo Croes tabata di bishita den mi programa hunto cu e promotor di e baile ruso y despues di a entrevista e promotor colombiana, mi a probecha pa puntra Milo

Croes tocante e asunto aki. Si tur cos ta regla y cu Aruba por bay spera un carnaval manera semper nos tabata goza sin ningun clase di polemica. Milo a contesta cu tur cos ta hopi bon y cu nan a caba di paga ASOMA. Despues cu Milo a bay, telefon ta ring y un oyente cu un voz fresco ta bisa cu mester stop di busca problema for di awor y toca musica di pasco. Figurabo for di luna di october nan ta existi musica di pasco y ni kico a mustanan riba loke ta ser spera pa nos carnaval 43 y mester paga e candela for di awor, tog e oyente no kier a tende nada y hasta a insulta tur nos periodistanan y locutornan cu ta nan ta fomenta problema aki na Aruba. Awor mi kier tende di e oyente ey, ta ken a fomenta e problema y ta ken kier a yuda pa soluciona e problema na tempo..

**** Apesar di tur cos awe nochí Tivoli Club lo ta na candela cu nan fakkel optocht.** Siman pasa a cancela esaki y hopi hende a tira culpa riba e concierto di Salsérin. Pero tanto na radio y television Bibi Arends mes ta declara cu ta Tivoli Club mes no tabata bon prepara pa esaki tuma lugar. Nos ta spera cu awe henter pueblo di Aruba lo sali masalmente pa goza canti caminda di e fakkel optocht unico di Tivoli Club y pa despues tambe paga e candela "for once and all".

**** Ayera durante un conferencia di prensa ASOMA a participa cu nan a solicita pa nan vergunning di Calypso y Tumba Contest.** E festival di Calypso lo bay tuma lugar dia 25 di januari, pues net riba e glorioso fecha di nos inolvidable libertador Betico Croes. Ta di spera cu esaki lo bay resulta den un exito rotundo. Nos a tuma nota cu e aña aki e musiconan ta mas uni cu nunca y esaki tambe a duna e directiva di ASOMA hopi mas forza pa sigui lucha pa nan derecho.



**** Durante e entrevista cu mi a logra cu Milo Croes den e programa "Boedoem", Milo Croes a ripiti varios biaha cu ta pa MALO el a laga e cheque BONS.** Puntra Milo ta di con, el a duna di conoce cu esaki ta simplemente un les pa ASOMA.

**** Entrevistando un dia prome Elgin Juddan, el a duna di conoce cu nan no por yega na un acuerdo cu SAC debi na e forma tergo di Milo Croes.** Despues cu e cheque a bons y Milo no kier tende di nada, no a yega un otro recurso pa stop di traha cu SAC.

**** Mirando henter e asunto aki, tur e problema ta sinta den "MONEY".** No ta por nada Robert Jeand'or ta canta den su roadmarch nobo "I want my money NOW".

**** Pero awor e asunto cu SAC no a caba, pasobra conociendo Milo Croes, e no ta entrega e pelea aki facil y sigur e lo bay trata cueste loque cueste pa haya su pida bolo bek.**

**** Después di carnaval tin un otro batata cayente ta bay hasa den e mesun panchi di ASOMA, ya cu por a tende**

gritonan di tur skina cu ASOMA mester bay defende e bandanan local cu a participa durante e Aruba

Ritmo & Jazz Festival y cu te ainda no a ricibi nan "MONEY". Robert y su Solo Banda Show tambe a participa durante e evento aki y awor nos por a compronde cu Robert di cu e tema aki lo sigui resona despues di temporada di carnaval, esta "I want my money NOW".

**** Ayera durante e programa di "Boedoem" colega Yubi Naar tabata hopi skerpi y awe den su comentario di tur dia por lesa mas di esaki.** E comentario di Yubi Naar a pone hopi hende para ketu y hasta hendenan cu bo no por a kere a dune tur su rason. Telefon di DIARIO tabata mas cayente cu candela ayera cu hendenan felicitando Yubi Naar pa su comentarionan, te cu na dado momento Yubi a sali bay di DIARIO pa evita cantidad di yamadanan pa e no "PEGA BARCO". DEN AMBIENTE a hasta contesta un yamada cu a bini for di Curacao caminda un señora a expresa cu ta hendenan cu CURASHI asina mester na Curacao tambe!

**** Dianueos nos amigo y colega Giovanni Atalita di Musica & Espectaculo di La Prensa tabata na Aruba hunto cu e delegacion di asosacion di musico di Curacao.** E rueda di prensa a tuma lugar den e prestigioso Cheers Cafe Bistro, na unda e interes tabata hopi grandi di parti prensa local. Durante e rueda di prensa a sali na cla cu tanto un cantante y musico por participa durante e festival di Tumba na Curacao. Lesa bon! participa e por participa, pero bo ta kere cu e por CLASIFICA.

**** No tin duda cu e aña aki tanto nos prestigioso aerolínea AIR ARUBA y ALM lo mester busca extra flight pa tanto dia 24 y 25 di januari, debi cu e interes ta sumamente grandi.** Esaki no tin duda! ya cu e festival di Tumba na Curacao a demostra cu e ta un espectáculo bon organiza riba nivel y caliber. Loke ta mas interesante durante e festival aki, cu tur hende ta baila y goza manera un famia den Curacao Festival Center, anto ta esaki tur hende di bon gusto na mundo ta gusta.

**** Tin varios hende ta rabia pasobra Curacao su tumba ta atrae hopi di nos hendenan, pero si Trinidad tabata mas serca di nos, mi ta pusta tur placa di mundo cu hopi di nos hendenan lo viaha masalmente pa bay goza nan festival di Calypso.** Ta cosnan cu hopi hende no kier tende y mira, pero mester biba cu e REALIDAD.

**** Shonnan te aki mi ta keda, prome cu mi mes cende mi mes na candela.** Otro siman nos lo ta di viahe hunto cu D2U-365 pa New Orleans. Corda bon no ta ami a pidi pa viahe, ta un honor mi a haya di a ser RECOMENDA y mi ta sumamente orguyoso di por forma parti di e viahe HISTORICO aki hunto cu e INCOMPARABLE BRASSBAND INTERNATIONAL D2U-365..pasa un feliz weekend y te awemer dia den e aire di custimber

